

# Sustegn da la Svizra per il Cosovo

■ (anr/ld) Dapi ils 28 da favrer è il Cosovo in pajais independent. Cumbain che questa giuvna naziun ha acceptà ina nova constituziun e formulà in respectabel dumber da leschas che han creà la basa giuridica ed instituziunala per structuradas politicas, economicas e socialas sto il Cosovo anc surmuntar considerablas difficultads per garantir ses avegnir. La situaziun da segirezza è ussa relativamain stabila. Problems da segirezza existan en la part dal nord. Per il proxim temp resta necessari l'agid da la multinaziunala Kosovo Force (KFOR) per garantir la stabilitad dal Cosovo. Dapi l'onn 1999 è er preschenta la Svizra en il Cosovo cun in contingent ch'il parlament federal ha limità fin l'onn 2011. La Svizra è activa sin il sectur logistic, da transport e da l'infurmaziun. Actualmain dispona la truppa da la pli gronda capaciad da transport cun helicopters. Il cussegl federal propona uss al parlament da prolungar questa missiun fin l'onn 2014. El vul dentant avair la pussaivladad d'interrumper la missiun sche necessari.

## Promoziun civila da la pasch

Tenor l'artitgel 54 da la constituziun federala s'engascha la confederaziun per mantegnair l'indipendenza da la Svizra e per sia prosperitad; ella contribuescha oravant tut a mitigiar la misergia e la povradad en il mund, a respectar ils dretgs umans ed a promover la democrazia e la convivenza paschaivla dals pievels.

Actualmain dispona la Svizra da dus centers (Turitg e Geneva) che han per mira la perscrutaziun e la promoziun civila da la pasch. Il «Center for Security Studies, CSS» da la Scola politecnica a Turitg e dal Departament federal

da defensium, protecciun da la populaziun e sport che exista dapli l'onn 1986. L'institut è sa sviluppa ad in center da cumpetenza en dumondas da la politica naziunala ed internaziunala da segirezza. A Geneva existan trais centers che s'occupan da la politica da segirezza, da la deminaziun umanitara e da controlla democratica da las forzas armadas. En l'avegnir duain ils centers a Geneva esser suttaless al Departament federal d'affars exterius. Il cussegl dal chantuns ha acceptà in credit da 26,4 milliuns francs per ils onns 2012 fin 2015.

## L'engaschi vegn apprezzà

Bruno Frick, (pcd/SZ), il pledader da la cumissiun, ha fatg attent che la Svizra haja in interess tut particular ch'i restia segirada la pasch e la stabilitad en il Cosovo ed en questa regiun. In pegiurament da la situaziun pudess avair con-

sequenzas directas per la Svizra che dat lavur e domicil a var 200 000 personas or da questa regiun. Tar ina inspeziun en il Cosovo han confermà represchentants da las autoritads che la lavur da la Svizra vegnia apprezzada. La via a la stabilitad ed a la prosperitad dal Cosovo vegnia dentant anc ad esser lunga e stentusa. Problems datti surtut cun la cumpart serba en il nord che n'accepta betg la decisiun d'indipendenza. Frick ha er accentuà la muntada da l'engaschi per l'armada svizra che po far experient-schas sin quest territori difficil ed uschia er amplifitgar lur enconuschientschas militaras. Fin uss han sa participà a quest engaschi facultativ var 4200 personas svizras.

Il cussegl dals chantuns ha sco emprima chombra acceptà la proposta dal cussegl federal da sa participar vinavant a la multinaziunala Kosovo Force (KFOR) fin ils 31 da december 2014. Ils custs èn calculads cun var 40 milliuns francs l'onn. L'effectiv maximal da 220 personas po vegnir augmentà a curt termin per maximal 80 personas durant in onn. Quest augment da l'effectiv duai lubir a la Svizra da surpigliar funcziuns superiusas e da sustegnair las stentas per rinforzar las structuradas politicas d'in stadi da dretg.



Felix Gutzwiller (san.) en discussiun cun Bruno Frick.